

JU MUZEJ ISTOČNE BOSNE TUZLA



Izložba:

Muzej istočne Bosne Tuzla 1947-2012



MUZEJ ISTOČNE BOSNE
TUZLA
decembar, 2012.

MUZEJ ISTOČNE BOSNE TUZLA

Muzej istočne Bosne Tuzla je osnovan 1947. godine Odlukom Gradskog odbora, kao Muzej narodnooslobodilačke borbe. Djelatnost Muzeja je obuhvatala period revolucije 1941.-1945. godine, na području Tuzle i bliže okoline.

U maju 1950. godine Muzej je proglašen Zavičajnim. Djelatnost rada se proširuje sa perioda narodnooslobodilačkog rata i revolucije i na oblast arheologije i etnologije.

Zbog nedostatka stručnog kadra, neriješenog finansiranja i prostora, Muzej je 1951. godine morao biti zatvoren, da bi 1953. godine ponovo počeo s radom.



Početkom 1962. godine, na osnovu Rješenja i uz finansiranje od strane Skupštine sreza Tuzla, Muzej nastavlja djelatnost kao Muzej istočne Bosne u Tuzli, sa zadatkom da istražuje i prikuplja materijal i građu iz oblasti arheologije, etnologije, historije, umjetnosti i privrede na području sreza Tuzla, kao i da, s tim u vezi, vrši uporedna istraživanja na susjednim područjima. Tako je, od tog vremena, Muzej postao regionalni muzej kompleksnog tipa, koji je muzejsku djelatnost obavljao na prostoru cijele sjeveroistočne Bosne (19 opština).

Danas je Muzej istočne Bosne javna ustanova, koja djeluje kao matični muzej Tuzlanskog kantona i koja je kompleksna naučna, kulturna i obrazovna institucija, s funkcijom proučavanja, čuvanja i prezentacije kulturnih vrijednosti, nacionalne kulturne baštine i tradicije svih naroda koji žive na prostoru Tuzlanskog kantona.

Od 1947. godine, kada je osnovan, do danas, Muzej istočne Bosne radi u veoma teškim i neadekvatnim uslovima. Nikada nije imao vlastiti objekat i do sada je preseljavan 19 puta, uvijek u neodgovarajuće prostore. Ekspozitni su trenutno smješteni u četiri objekta na različitim lokacijama u gradu.

Bez obzira na sve probleme, muzejska djelatnost je obavljena profesionalno i u toj oblasti postignuti su značajni rezultati, zbog čega je Muzej istočne Bosne bio jedan od značajnijih muzeja u Bosni i Hercegovini i bivšoj Jugoslaviji.

Do danas je prikupljeno i stručno obrađeno preko 30.000 eksponata, realizovano više od 100 izložbi, obavljene desetine naučnih istraživanja iz oblasti arheologije, etnologije, historije i prirodnih nauka.

Rezultati naučnih istraživanja objavljuvani su i prezentirani domaćoj i svjetskoj javnosti putem naučnog časopisa: „Članci i građa za kulturnu historiju istočne Bosne” («Artikel und materialen zur Kulturgeschichte Ostbosniens», «Articles and study materials for the cultural history of east Bosnia»), čiji je izdavač Muzej istočne Bosne. Od prvog broja, koji je štampan 1957. godine, do danas je objavljeno 19 brojeva ove publikacije.



Značajno je napomenuti da je putem razmjene ovog časopisa, Muzej istočne Bosne ostvario saradnju sa oko 300 naučnih institucija u više od trideset zemalja svijeta. Tako se ovaj časopis nalazi u bibliotekama mnogih muzeja i naučnih institucija u Austriji, Njemačkoj, Italiji, Francuskoj, Španiji, Švedskoj, Mađarskoj, Poljskoj, Velikoj Britaniji, Turskoj, Rusiji, SAD-u, Japanu, kao i u mnogim drugim zemljama Evrope i svijeta.

Muzej istočne Bosne je kroz izdavačku djelatnost, pored publikacije „Članci i građa za kulturnu historiju istočne Bosne“, objavio veliki broj izložbenih kataloga, muzejskih vodiča, te stručnih knjiga i monografija.

Općinsko vijeće Tuzla je 2004. godine donijelo Odluku o davanju objekta bivše Interne bolnice na trajno korištenje Muzeju istočne Bosne. Objekat se nalazi na elitnoj lokaciji u neposrednoj blizini historijskog jezgra grada, a sa 2.000 m² korisne površine, uz namjensku adaptaciju i rekonstrukciju, pruža mogućnost za smještaj i prezentaciju muzejskog blaga, prema svjetskim muzeološkim standardima.

U budućoj muzejskoj zgradi će biti postavljena stalna izložba koja će pratiti kontinuitet života na prostoru istočne i sjeveroistočne Bosne, od prahistorije do savremenog doba.

Za svako muzejsko odjeljenje će biti obezbijeđen odgovarajući prostor, kako za stalne postavke, tako i za depoe, u kojima treba osigurati optimalne uslove za čuvanje eksponata.



Muzej istočne Bosne Tuzla 1947-2012

IZLOŽBA: Muzej istočne Bosne Tuzla 1947-2012

IZDAVAČ: JU Muzej istočne Bosne Tuzla

ZA IZDAVAČA: Vesna Isabegović, direktorica

AUTOR: Nataša Perić, kustos historičar

TEHNIČKA PRIPREMA: Senad Begović, prof. historije

LIKOVNA OPREMA: Fototeke arheološkog, etnološkog i
umjetničkog odjeljenja Muzeja istočne Bosne Tuzla

Tuzla, decembar 2012.

